



Broj: 05-4365-7/18  
Sarajevo, 21. 12. 2018. godine

Na osnovu člana 70. Zakona o javnim nabavkama ("Službeni glasnik BiH", broj 39/14), preporuke Komisije za javne nabavke iz Zapisnika o pregledu i ocjeni ponuda, broj: 05-4365-6/18 i 05-4365-6-1/18 od 19. 12. 2018. godine i člana 16. Statuta Agencije za bankarstvo Federacije BiH ("Službene novine Federacije BiH, broj 3/18), direktor ugovornog organa - Agencija za bankarstvo Federacije BiH, u postupku javne nabavke usluga održavanja motornih vozila, donosi

## **ODLUKU**

### **o poništenju postupka javne nabavke – Lot 1 i Lot 2 usluga održavanja motornih vozila**

#### **I.**

Prihvata se preporuka komisije za nabavke iz Zapisnika o pregledu i ocjeni ponuda, broj: 05-4365-6/18 i 05-4365-6-1/18 od 19. 12. 2018. godine i poništava se postupak konkurentskog zahtjeva za dostavu ponuda za nabavku usluga održavanja motornih vozila u vlasništvu Agencije za bankarstvo Federacije BiH ( u nastavku: ugovorni organ), s obzirom da nijedna od primljenih ponuda nije prihvatljiva.

#### **II.**

U skladu s odredbama člana 70. stav (6) Zakona, ugovorni organ objavit će ovu odluku na svojoj internetskoj stranici [www.fba.ba](http://www.fba.ba), istovremeno s upućivanjem iste ponuđačima koji su učestvovali u ovom postupku.

#### **III.**

Danom stupanja na snagu ove odluke prestaje da važi Odluka ugovornog organa o izboru najpovoljnijeg ponuđača - Lot 1 i Lot 2, i poništenju postupka - Lot 3 u postupku javne nabavke usluga održavanja motornih vozila, broj: 05-4365-5/18 od 11. 12. 2018. godine.

#### **IV.**

Zadužuje se ovlaštena osoba ugovornog organa da, u skladu s odredbama člana 100. stav (3) Zakona o javnim nabavkama ("Službeni glasnik BiH", broj 39/14) i tačkom I. ovog rješenja, objavi obavještenje o poništenju predmetnog postupka javne nabavke, i da o tome obavijesti učesnike u predmetnom postupku.

#### **V.**

Ova odluka stupa na snagu danom donošenja i dostavit će se svim ponuđačima koji su učestvovali u postupku javne nabavke, saglasno odredbama člana 71. stav (2) Zakona.

## **OBRAZLOŽENJE**

U skladu s Odlukom o pokretanju postupka javne nabavke broj: 05-4365/18 od 05. 11. 2018. godine odobreno je pokretanje postupka javne nabavke usluga održavanja motornih vozila u vlasništvu ugovornog organa, procijenjene vrijednosti nabavke 24.000,00 KM bez uračunatog poreza na dodanu vrijednost (PDV), na period od jedne godine.

Predmetna nabavka podijeljena je na 3 (tri) lota, kako slijedi:

- LOT 1.: usluge održavanja putničkih automobila marke „Škoda“ i „Volkswagen“ – 12.000,00 KM bez uračunatog PDV-a;
- LOT 2.: usluge održavanja putničkih automobila marke: „Volkswagen“, koja su garantnom roku – 6.000,00 KM bez uračunatog PDV-a;
- LOT 3.: usluge održavanja putničkih automobila marke: „Peugeot“, koja su u garantnom roku – 6.000,00 KM bez uračunatog PDV-a.

Imajući u vidu procijenjenu vrijednosti nabavke, saglasno članu 14. stav (1) Zakona o javnim nabavkama („Službeni glasnik BiH“, broj: 39/14 – u nastavku: Zakon), ugovorni organ primijenio je postupak konkurentskog zahtjeva za dostavu ponuda s namjerom zaključenja okvirnog sporazuma s jednim ponuđačem za svaki Lot posebno, prema tehničkim zahtjevima i uslovima zadanim u TD, uz primjenu kriterija najniže cijene tehnički zadovoljavajuće ponude.

Obavještenje o nabavci, broj: 3010-7-2-334-3-52/18 objavljeno je na Portalu javnih nabavki (ejn.gov.ba), dana 22. 11. 2018. godine, uz istovremeno upućivanje poziva za dostavu ponuda na adrese petorice potencijalnih ponuđača.

Komisiju za provedbu predmetnih usluga imenovana od strane direktora ugovornog organa provela je procedure otvaranja ponuda, pregledavanja i ocjene ponuda i davanje preporuke za donošenje odluke o izboru najpovoljnijeg ponuđača.

Nakon provedene nabavne procedure ugovorni organ je pridržavajući se preporuke iz Zapisnika o pregledu i ocjeni ponuda, broj: 05-4365-4/18 (Lot 1), 05-4365-4-1/18 (Lot 2) i 05-4365-4-2/18 (Lot 3) od 06. 12. 2018. godine sačinjenih od strane komisije nadležne za provođenje ovoga postupka nabavke, uvažavajući zadani kriterij najniže cijene tehnički zadovoljavajuće ponude, saglasno članu 70. stav (1) Zakona, donio Odluku o izboru najpovoljnijeg ponuđača - Lot 1 i Lot 2, i poništenju postupka - Lot 3 u postupku javne nabavke usluga održavanja motornih vozila, broj: 05-4365-5/18 od 11. 12. 2018. godine, kojom su društvu „AC Quattro“ d.o.o. Sarajevo dodijeljeni okvirni sporazumi za javnu nabavku usluga u dijelu postupka koji se odnosi na Lot 1 i Lot 2, kao najbolje ocijenjenom ponuđaču po predmetnom postupku nabavke, odnosno ponuđaču čija je ponuda jedina ocijenjena kao prihvatljiva za ugovorni organ.

Dana 18. 12. 2018. godine, u propisanom roku, društvo „Autodelta“ d.o.o. Sarajevo, kao ponuđač u ovom postupku u dijelu koji se odnosi na Lot 1 (u nastavku: žalilac) izjavilo je žalbu na Odluku o izboru najpovoljnijeg ponuđača u dijelu postupka koji se odnosi na Lot 1, broj i datum gornji, koju je ugovorni organ zaprimio istog dana.

Žalilac ističe da žalbu izjavljuje zbog pogrešno utvrđenog činjeničnog stanja i pogrešne primjene materijalnog prava na tako utvrđeno činjenično stanje, sa prijedlogom da ugovorni organ ponovno preispita svoju odluku, te uvažavajući žalbene navode poništi postupak u dijelu koji se odnosi na Lot 1, obzirom da niti jedna od zaprimljenih ponuda ne ispunjava uslove i zahtjeve navedene u Tenderskoj dokumentaciji ( u nastavku: TD), u predmetnom Lotu.

Žalilac u žalbi dalje navodi:

U TD, u dijelu koji se odnosi na tačku 3.3. – Ekonomska i finansijska sposobnost ponuđača– član 47. Zakona, podtačka 3.3.1 definisani su minimalni uslovi koje su ponuđači dužni ispuniti da bi njihova ponuda bila tehnički ispravna, pa je u konktetnoj tački u alineji pod a) zahtijevano da bankarski računi ponuđača nisu bili blokirani u zadnjih 12 (dvanaest) mjeseci ili od početka poslovanja ako je ponuđač registrovan, odnosno počeo sa radom prije manje od 12 (dvanaest) mjeseci, računajući od dana izlaska obavještenja o nabavci.



Kao dokaz za ispunjavanje navedenog uslova zatraženo je da ponuđači dostave izvještaj o svim otvorenim računima pravnog lica koji izdaje Centralna banka BiH, koji ne smije biti stariji od datuma objave obavještenja za nabavku, te potvrdu izdanu od strane poslovne banke u kojoj ponuđač ima otvoren glavni račun, u kojoj je potrebno navesti da isti (glavni račun) nije bio blokiran u zadnjih 12 (dvanaest) mjeseci, računajući od datuma izlaska obavještenja o nabavci.

Na osnovu izvršenog uvida u ponudu izabranog ponuđača „AC Quattro“ d.o.o. Sarajevo ustanovljeno je da je isti, a vezano za gore navedene uslove i tražene dokaze dostavio Izvještaj o računima pravne osobe izdat od strane Centralne banke BiH na dan 12. 11. 2018. godine.

Dalje se navodi da, uzimajući u obzir navedeno, uvažavajući zahtjev iz TD kojim je traženo da navedeni izvještaj ne smije biti stariji od datuma objave obavještenja za nabavku (22. 11. 2018. godine) odabrani ponuđač nije ispunio u cijelosti sve zadane uslove iz podtačke 3.3.1 TD – Ekonomska i finansijska sposobnost ponuđača, odnosno člana 47. Zakona, s obzirom da je dostavljeni Izvještaj o računima pravne osobe izdat od strane Centralne banke BiH, stariji od datuma objave obavještenja o nabavci.

Žalilac dalje navodi da je u TD, u tački 3.4. Tehnička i profesionalna sposobnost ponuđača alineja pod d) ugovorni organ tražio da ponuđač dostavi izjavu da je u posljednjoj poslovnoj 2017. godini prosječan broj zaposlenih iznosio minimalno 7 (sedam) zaposlenika, te da navedena izjava o ispunjavanju uslova iz tačke 50) Zakona, mora biti ovjerena kod nadležnog organa.

Uvidom u dostavljenu dokumentaciju, ustanovljeno je da navedena izjava nije ovjerena od strane nadležnog organa, već da je ovjerena kopija Liste osiguranih lica za obveznika.

Razmatrajući po žalbi ovog ponuđača, nakon što je u skladu s članovima 97. i 100. Zakona utvrđeno da je ista blagovremena, dopuštena i izjavljena od strane ovlaštene osobe, čime su ispunjene procesne pretpostavke za razmatranje iste, komisija ugovornog organa je, saglasno članu 65. Zakona, pristupila ponovnom pregledu i ocjeni ponuda u skladu s utvrđenom procedurom, te na osnovu izvršene analize istih u pogledu ispunjavanja zadanih uslova iz TD u ponovljenom postupku ocjenjivanja ponuda, utvrdila slijedeće:

U tački 3. TD – Uslovi za kvalifikaciju ponuđača, podtačka 3.3. - Ekonomska i finansijska sposobnost ponuđača – član 47. Zakona, definisano je da ponuđači, uz ostalo, trebaju ispunjavati slijedeći uslov:

- da bankarski računi nisu blokirani u zadnjih 12 (dvanaest) mjeseci ili od početka poslovanja ako je ponuđač registrovan, odnosno počeo sa radom prije manje od 18 mjeseci od dana izlaska obavještenja o nabavci, te kao dokaz o zadovoljenju tog zahtjeva dostaviti;
- izvještaj o svima otvorenim računima pravnog lica koji izdaje Centralna banka BiH s tim da isti ne smije biti stariji od datuma objave obavještenja za predmetnu nabavku: uz navedeni izvještaj ponuđač je dužan dostaviti potvrdu izdanu od strane banke, u kojoj je otvoren glavni račun, sa naznakom od strane banke da navedeni račun ponuđača – glavni račun nije bio blokiran u zadnjih 12 (dvanaest) mjeseci računajući od datuma objave obavještenja o nabavci.

U vezi s ispunjenjem navedenog uslova komisija je u ponovljenom postupku ocjenjivanja ponuda, odnosno nakon izvršenog ponovnog uvida u ponudu izabranog ponuđača „AC Quattro“ d.o.o. Sarajevo ustanovila da je ovaj učesnik u nadmetanju, a vezano za gore navedeni uslov i traženi dokaz dostavio Izvještaj o računima pravne osobe, izdan od strane Centralne banke BiH, na dan 12. 11. 2018. godine, te je ustanovljeno da je navedeni izvještaj stariji od datuma objave obavještenja o nabavci (22. 11. 2018. godine), te je konstatovala da ponuđač „AC Quattro“ d.o.o. Sarajevo nije ispunio u cijelosti sve zadane uslove iz podtačke 3.3 TD – Ekonomska i finansijska sposobnost ponuđača, odnosno člana 47. Zakona.

Uvidom u dostavljenu dokumentaciju ustanovljeno je da je kopija Liste osiguranih lica za obveznika ovjerena kod nadležnog organa, ali da Izjava o prosječnom broju zaposlenih u 2017. godini nije ovjerena od strane nadležnog organa, te je konstатовano da ponuđač nije ispunio uslove iz TD tražene tačkom 3.4 Tehnička i profesionalna sposobnost ponuđača, odnosno člana 50. Zakona.



Obzirom da je komisija izvršila ponovni pregled i ocjenu kvalifikacijske dokumentacije i u dijelu postupka koji se odnosi na Lot 2, te da je ustanovljeno da ponuda odabranog ponuđača i u ovom dijelu predmetne nabavke ne ispunja gore navedene uslove i zahtjeve TD, komisija je utvrdila:

- da ponude ponuđača „AC Quattro“ d.o.o. Sarajevo u dijelu postupka javne nabavke koji se odnosi na Lot 1 i Lot 2 nisu kvalifikovane i prihvatljive za ugovorni organ s obzirom da u sastavu istih nisu dostavljeni valjani dokazi vezani za ispunjavanje uslova navedenih u podtački 3.3. TD – Ekonomska i finansijska sposobnost ponuđača i podtački 3.4 Tehnička i profesionalna sposobnost ponuđača TD, te predložila da iste, iz razloga što nisu potpune i ne ispunjavaju sve zahtjeve iz TD, saglasno članu 68., stavovi 1) i 4) tačka i) Zakona, odbace kao neprihvatljive za ugovorni organ.

Shodno navedenom, a uvažavajući činjenicu da u predmetnom postupku u dijelu nabavke koja se odnosi na Lot 3 nije zaprimljena nijedna ponuda u određenom krajnjem roku, te je isti poništen, komisija za nabavku je dala preporuku da se shodno odredbama člana 69. stav (2) tačka d) predmetna javna nabavka poništi i u dijelu postupka koji se odnosi na Lot 1 i Lot 2, obzirom da nijedna od primljenih ponuda nije prihvatljiva za ugovorni organ.

#### **POUKA O PRAVNOM LIJEKU:**

Protiv ovog rješenja može se izjaviti žalba Ugovornom organu – Agenciji za bankarstvo Federacije BiH, najkasnije u roku od 5 (pet) dana od dana prijema ovog rješenja, saglasno odredbama člana 100. stav (4) Zakona.

Žalba se izjavljuje Uredu za razmatranje žalbi/Kancelariji za razmatranje žalbi – Filijala/Podružnica Mostar, putem ugovornog organa, u pisanoj formi, direktno ili preporučenom poštanskom pošiljkom. Žalba se podnosi u najmanje 3 (tri) primjerka.



Dostaviti:

- Učesnicima u postupku
- Sektoru zajedničkih funkcija
- a.a.

